



Eindredactie: Gré van der Veen

*t Gebeurde veur n joar of wat ien vekaanzietied. Wie zaten doudes-tieds nog nait zo vaast aan school-reusters as tegenworreg, t was vro ien junimoand. n Schiere nom-middag op t aailand. Aigelks mout je Aailand schrieven, mit n hoofd-letter: t is ja n aander woord veur Schiermonnikoog. Toch nog n bult drokte, want zo kort veur de vekaanzietied binnen der hail wat schoulraaiskes en zukswat.*

*Ik loop aan rechterkaant van weg over Middenstreek, even veurbie t drokste stee doar, bie Klontje zien bakkerij. Aan rechterkaant lopen mag aigelks nait, mor op t Aailand rieden zowat gain auto's, dat voor-uit mor. Leujong aan rechterhaand en dat snoatert en snaist ien ain taim deur, zo heurt dat veur leujongs. Ridt ons n man op fiets veurbie, kikt om (n goie viefteger zo te zain) en zegt: "Dat heur je nait voak meer, kiender dij Grunnegers proaten".*

*Op zo'n moment mout je wat weer-om zeggen, wät dat gefit nait zo veul, as t mor rad komt, en ik zeg: "Der binnen nog gonnent dij t zulfs gewóón doun". Man kikt nog n moal om en bèlkt: "Nait zulfs, mor allerdeegs" en vot was e. Ik kon man nait, mor dou docht ik: Geert Genoat, wel aans?*

Wie laipen stoaregaan deur. Nait slim haard, want zuk gesnoater drukt t tempo van lutje kiender zo te reken. Kommen bie Kolstein om t ain of t aander te koopen en doar heur ik kassakerel proaten mit ons veurbie-fietser. t Was Geert veur en Geert noa. Dou wis ik: Geert Genoat, wel aans? Geert Genoat, dij aal joaren op Schier woonde, dij allerdeegs(!) aanderhaalf joar ien mien begelaaidenskemizzie ze-

ten haar, mor ik haar hom nog nooit zain en doar zai je mor weer aan, dat t Aailand wieder weg is as je wel ais denken.

Deur t gerevel van n luk kereltje heb ik Geert Genoat kennen leerd, en zo zai je óók dat Grunnegers proaten mit joen kiender nog aargenswoar goud veur wizen kin. Ie valen der mit op! Je kinnen t ook aansom zeggen en din heurt t net eefkes negatiever: der is hoast gainent meer dij t nog dut, en haildal nait ien t openbaar, stelt joe veur dat n aander t heuren zol...

Ze zeggen dat t beter is veur joen kiender dat ie heur gain Grunnegers leren. Ze hemmen ook hail laank zegd, dat wereld plat was. Ze zeggen dat schoulmeesters zeggen, dat t veur heur bestwil is as ze Hollands kinnen en gain Grunnegers (Veur wël zien bestwil?). Ik heb leste vat-tien doag mit n stuk of honderd schoulmeesters contact had en der was gain ain bie dij dat be-weerd het.. Ze zeggen dat kien-der mor ain taal leren mouten, aans kin t bie heur ien kloeten lopen goan... Zo langzoamaan begun ik te laggen: wat vienden ze aal nait oet om te verzwiegen dat ze eur schoamen veur taal van moeke, heurzulf en van noabers. Man, man. Dij aigenste kiender dij gain twij toalen heuren magen as ze n joar of vaaai-er, vief binnen -ien heur 'toalg-vuilege periode'- dij magen as ze twaalf binnen zeker wel Fraans, Duüts en Engels der bie leren en hoogvlaigers ook nog Grieks en Letien en n poar joar eerder gain Grunnegers?

Zellen wie dij lu dij zukse oet-vluchten bedenken, zel wie dij hail verzichtig aan t verstand brengen dat mainste schoulen ien Grunnen vandoag de dag slichtweg positief binnen over taal van dit stukje van Nederland? Meschain kin wie ien tus-sentied t ook nog even op n akkoordje gooien over vekaanzietied: proat dizze raais ais ge-woon Grunnegers, ook ien t boetenlaand. Wel wait, wël of je apmoal kennen leren van t zum-mer...